

ԿՈՈՊԵՐԱՑԻԱՅԻ ԵՎ ԿՈՆՏԵՍԱՑԻՆ ՍԵՓԱԿԱՆՈՒԹՅԱՆ ՀԱՐՅԻ ՇՈՒՐՋ

Լ. Ս. ԶԱՔԱՐՅԱՆ

Հայաստանի Հանրապետության «Գյուղացիական և գյուղացիական կոոպերատիվ տնտեսությունների մասին» օրենքով լուրջ քայլ արվեց տնտեսական բարեփոխումների ուղղությամբ: Սակայն հասկանալի է, որ օրենքի ընդունումը միայն գործի սկիզբն է: Հողի սեփականաշնորհումը՝ գյուղում նոր տնտեսական հարաբերությունների հաստատումը, այսօր հուզում է բոլորին, քանի որ նաև դրանից է կախված մեր հանրապետության ապագան և, հետևապես, մեր ազգային նպատակների իրագործումը: Օրենքի կիրարկումը ցույց տվեց, որ ամենուրեք չէ, որ գյուղացին հաճույքով է վերցնում հողը: Դա ունի իր տնտեսական, քաղաքական և հոգեբանական պատճառները:

Այսօր գյուղացու առջև տնտեսական շատ բարդ խնդիրներ են դրված, որոնք դժվարացնում են ընտրության հնարավորությունը: Դա և՛ ջրի (այսօր դեռևս չկա այդ դժվարին պրոբլեմը լուծելու միջոց), և՛ տեխնիկայի (մեր արդյունաբերությունը բազմաթիվ պատճառներով անկում է ապրում և դժվար է ասել, թե մոտ ապագայում հնարավորություն կունենա օգնել գյուղին), և՛ հողաբաժինների չափի ու որակի, և՛ սերմացուի, և՛ անասնակերի հարցն է: Այս խնդիրների մի մասը կարելի է լուծել արդեն այսօր՝ կոոպերացիայի օգնությամբ:

Հայտնի է, որ ԽՍՀՄ-ում կոոպերացիայի ձևերը երկուսն էին՝ արտադրական կոոպերացիան (կոլտնտեսությունները) և սպառկոոպերացիան: Պետք է նշել, որ կոոպերացիայի դասական սկզբունքներից ոչ մեկը հատուկ չէ խորհրդային կոոպերացիային և այն կոոպերացիա կարելի է անվանել սոսկ պայմանականորեն: Համեմատելու նպատակով կանգ առնենք այլ երկրներում մեծ տարածում գտած դասական կոոպերացիայի վրա, համառոտակի ներկայացնելով նաև նրա հիմքը կազմող ֆերմերային տնտեսությունը:

Ջարգացած կապիտալիստական երկրներում գյուղատնտեսական արտադրանքի հիմնական մասը այսօր արտադրվում է ֆերմաներում, որոնք ըստ արտադրության կազմակերպման ձևի լինում են.

1. ընտանեկան ֆերմաներ:

2. Համատեղ ֆերմաներ, երբ երկու կամ ավելի ֆերմաներ միավորում են իրենց սեփականությունը՝ համատեղ տնտեսություն վարելու նպատակով:

3. Գյուղատնտեսական կոոպերացիաներ: Դրանք բաժնետիրական ընկերություններ են, որոնք ստեղծվում են գյուղատնտեսական արտադրանք արտադրելու կամ վերամշակելու նպատակով:

Այս ձևերից ամենատարածվածը ընտանեկան ֆերման է (ԱՄՆ-ում 1982 թ. դրանք կազմում էին բոլոր ֆերմաների 87 %-ը)¹:

Ֆերմերային տնտեսությունները գործում են մրցակցության պայմաններում: Տարբերում են երկու տիպի մրցակցություն՝ կատարյալ (ոչ մոնոպոլիստական) և ոչ կատարյալ (մոնոպոլիստական): Խորհրդային գրականության մեջ անտեսվում էին ազատ (ոչ մոնոպոլիստական) մրցակցության դրական կողմերը՝ արտադրության խթանումը, հասարակական արտադրության համամասնության ապահովումը, արտադրանքի որակի անընդհատ բարձրացումը: Ազատ մրցակցության ուղղակի հակադրությունն է մոնոպոլիստականը, որը մեծ շարիք է մանր և միջին արտադրողների հա-

¹ А. А. Коньгин, Фермерское хозяйство США, М., 1989, с. 64.

մար: Մոնոպոլիաների ֆերմաների մեծությունը, տեխնիկական հագեցվածության բարձր մակարդակը, դրամական ազատ միջոցների կուտակումը, «լողակի անհնար են դարձնում մրցակցությունը: Ազատ մրցակցությունը նախատեսում է հավասար պայմաններ և հնարավորություններ մրցակիցների համար: Մոնոպոլիստական մրցակցությունը վերացնում է այդ հավասարությունը: Մոնոպոլիաները ավելի մեծ հնարավորություններ ունեն. դրանք կարող են հակառակորդին զրկել և՛ հումքից, և՛ շուկայից, կարող են իրենց օգտին փոփոխել նաև գների մեխանիզմը: Այս ամենի հետևանքով ֆերմերներին խորհուրդ էր տրվում խուսափել մոնոպոլիստական իրավիճակի ստեղծումից, հատկապես կերարտադրության, պարարտանյութերի, գյուղատնտեսական տեխնիկայի միջոցների արտադրության ոլորտներում²:

Մրցակցությունը դիմանալու միջոցներից է կոոպերացիան, որը բավական լայն տարածում է գտել կապիտալիստական երկրներում: Գյուղատնտեսական կոոպերատիվները առաջացել են անցյալ դարի կեսին և այսօր որոշ երկրներում գերիշխող դիրք են գրավում: Կոոպերատիվները ֆերմերների կամավոր կազմակերպություններ են, որոնց անդամները ընդհանուր սեփականության հիման վրա իրենց ապահովում են անհրաժեշտ ծառայություններով: Կոոպերացիայի դասական սկզբունքները փոփոխություն չեն. կրել ստեղծման ժամանակից: Դրանք են՝

1. կամավորության կամ բաց անդամության,
 2. բաժնետիրական (բաժնեվճարը, շահույթն ու հնարավոր կորուստները բաշխվում են կոոպերատիվի անդամների միջև ստացվող ծառայությունների ծավալին համապատասխան),
 3. դեմոկրատական կառավարման (յուրաքանչյուր անդամ, անկախ բաժնեվճարի չափից, ունի մեկ ձայնի իրավունք. դրանով կոոպերացիան տարբերվում է բաժնետիրական ընկերություններից):
- Կոոպերատիվներն ունեն իրավաբանական անձի կարգավիճակ: Դրանք ֆերմերներին մի շարք առավելություններ են ընձեռում.

1. հեշտացնում են վարկ ստանալը, պայմաններն ավելի ձեռնտու են դառնում,
2. կոոպերատիվի անդամները հարկային արտոնություններ են ստանում,
3. ուսկի գործոնը փոքրանում է,
4. մոնոպոլիաների հետ մրցակցության հնարավորություններ չեն ստեղծվում և այլն:

Կոոպերացիայի սկզբունքներից է նաև կոոպերատիվների ձևերի բազմազանությունը և կառուցվածքի ընտրության ազատությունը:

Կոոպերատիվները լինում են՝

1. Արտադրական կոոպերատիվներ, որոնք միմյանցից տարբերվում են հանրայնացման աստիճանով: Դրանցում կարող են հանրայնացված լինել միայն հողը կամ աշխատանքի միջոցները, գյուղատնտեսական կենդանիները կամ միայն արտադրանքը:

2. Մարքեթինգային կոոպերատիվները զբաղվում են արտադրանքի տեսակավորմամբ, վերամշակմամբ, փաթեթավորմամբ, տեղափոխությամբ, գովազդով և իրացումով: Այս կոոպերատիվները լայնորեն տարածված են, որովհետև գյուղատնտեսական արտադրանքի շատ փոքր տոկոսն է չմշակված հանվում շուկա (ԱՄՆ-ում՝ 10 %³, ԳՖՀ-ում՝ ընդամենը 4 %⁴):

² М. Бакетт. Фермерское производство: организация, управление, анализ, М., 1989, с. 265.

³ А. А. Конюгин, 1994, № 59.

⁴ С. Б. Андреев, Аграрно-промышленный комплекс ФРГ: особенности и проблемы формирования, М., 1987, с. 38.

3. Մատակարարող կոոպերատիվները արտադրության միջոցներ են մատակարարում իրենց անդամներին: Դրանց թվին են պատկանում եվրոպական երկրներում տարածում գտած «մեքենաների կոոպերատիվները», որոնք, սակայն, ընդհանուր սեփականություն չունեն: Յուրաքանչյուր ֆերմեր կոոպերատիվի մյուս անդամներին տրամադրում է իր սեփական տեխնիկան և ինքը կարող է օգտվել դրանց սեփականությունից: Այս կոոպերատիվի նպատակն է կրճատել գյուղատնտեսական մեքենաների համար կատարվող ծախսերը:

4. Սպասարկող կոոպերատիվները բազմաթիվ գյուղատնտեսական ծառայություններ են մատուցում ֆերմերներին (օրինակ, մեխորատիվ աշխատանքներ են կատարում, անասնակեր են պատրաստում և այլն): Դրանց թվին են պատկանում նաև տեղեկատվական և համակարգիչ կոոպերատիվները:

Ճապոնիայում կոմպյուտերային տեխնիկայով այսօր հագեցած են միայն խոշոր տնտեսությունները: Մանր տնտեսությունները զրկված են այդպիսի հնարավորությունից, սակայն կարող են օգտվել կոոպերատիվների ծառայություններից:

Սպասարկող կոոպերատիվների թվին են պատկանում ընտրասերման կոոպերատիվները: ԳՖՀ-ում այդպիսի կոոպերատիվները պետական կազմակերպությունների մասնակցությամբ ընտրում և ատեստավորում են ցուլերին: Չատեստավորված անասունների օգտագործումը ընտրասերման համար պատժվում է մինչև մեկ տարի ազատազրկմամբ կամ տուգանքով: Այդ պատճառով ֆերմերների մոտավորապես 90 %-ը օգտվում է ընտրասերման կոոպերատիվների ծառայություններից⁵:

ԱՄՆ-ի գյուղատնտեսության նախարարությանը կից գործում է ներդրման կոոպերատիվ ծառայությունը, որը ֆերմերներին տեղեկացնում է ագրոարդյունաբերական համալիրում տեղի ունեցող բոլոր տեխնոլոգիական, տնտեսական, առևտրական փոփոխություններին, ծանոթացնում է այն բոլոր տեխնոլոգիաներին, որոնք արդեն փորձարկվել են գյուղատնտեսական կայանների փորձարարական ֆերմաներում:

Անհրաժեշտ է նշել, որ կոոպերացիան յուրաքանչյուր երկրում ունի իր առանձնահատկությունները: Դա կախված էր տվյալ երկրի բնակլիմայական պայմաններից, արտադրանքային զարգացման մակարդակից, պատմական և ազգային առանձնահատկություններից: Օրինակ, Ճապոնիայում հողակտորների միջին չափը չի անցնում 1,2 հեկտարից, հողակտորների մեծ մասը գտնվում է թեքությունների վրա: Սեփական տեխնիկա ունենալը, հատկապես գյուղատնտեսական թանկարժեք մեքենաներ, տնտեսապես շահավետ չէ, այդ պատճառով Ճապոնիայում լայնորեն տարածված են «մեքենաների կոոպերատիվները», որոնք կարող են իրենց անդամներին տրամադրել ցանկացած գյուղատնտեսական մեքենա:

ԱՄՆ-ում, համեմատած եվրոպական երկրների հետ, կոոպերացման մակարդակը ավելի ցածր է: Դա բացատրվում է գյուղատնտեսության մեջ մոնոպոլիաների ներթափանցմամբ և գերիշխանությամբ: Դրա հետևանքով մրցակցությունը այստեղ կատարյալ չէ, և ամերիկյան ֆերմերները, համեմատած արևմտամրոպական ֆերմերների հետ, իրենց տնտեսությունը վառելիս ավելի մեծ դժվարությունների են հանդիպում: Այդ պատճառով, շնայած ԱՄՆ-ի բնակլիմայական նպաստավոր պայմաններին, փոքր ֆերմաները (տարեկան 20 հազ. դոլարից պակաս արտադրանք իրացնողները), որոնք կազմում են բոլոր ֆերմաների 72 %-ը, հողային տիրույթների 29 %-ը, աշխատուժի 24 %-ը, 11 %-ից պակաս արտադրանք են տալիս⁶:

⁵ Նույն տեղում, էջ 18:

⁶ А. А. Копыгин, *նշվ. աշխ.*, էջ 68:

Սակայն ինչպիսին էլ լինեն տարբերությունները՝ կոոպերացիայի սկզբ-բունքները, նրա տեսակների բազմազանությունը պահպանվում է բոլոր եր-յրրներում: Կապիտալիստական առաջավոր երկրներում որպես սկզբնական տնտեսական միավոր պահպանվում են ընտանեկան ֆերմաները: Կոոպերա-ցիայի հաջողությունները պայմանավորված են նաև նրանով, որ այն ոչ թե վերացնում է իր անդամների սեփականությունը, այլ՝ ամրապնդում: Կոո-պերացիան թույլ է տալիս տնտեսել և կապիտալը, և աշխատանքը, և ար-տադրամիջոցները: Միևնույն ֆերմերը սովորաբար մի քանի կոոպերատիվ-ների անդամ է լինում:

Կոոպերացիայի կշիռը որոշ երկրներում պարզելու համար բերենք մի քանի տվյալներ: ԱՄՆ-ում կոոպերատիվների ձևերում է գյուղատնտեսական արտադրանքի վերահսկման և իրացման 30, ֆերմաների նյութատեխնիկա-կան մատակարարման 27 %-ը⁷: Ճապոնիայում գյուղատնտեսական ար-տադրանքի 55 %-ը պատկանում է կոոպերատիվներին, այդ թվում բրնձի արտադրության՝ 64, բանջարեղենի՝ 45, մրգերի՝ 90 %-ը⁸: Ֆրանսիայում կոոպերատիվները վերամշակում են ցորենի՝ 70, կաթնամթերքի՝ 47 %, նրանց ձեռքում է խաղողագործության՝ 50, կերարտադրության՝ 35, բան-ջարեղենային պահածոների՝ 30 %-ը⁹: Իտալիայում արտադրամիջոցների մա-տակարարման 40 %-ը իրականացնում են կոոպերատիվները, նրանք են վե-րամշակում գյուղատնտեսական: արտադրանքի 25 %-ը, իրացնում են 17 %-ը¹⁰: Հոլանդիայում կոոպերատիվները արտադրում են կաթի՝ 87, պան-րի՝ 92, կենդանական յուղերի՝ 94, կաթի փոշու՝ 81, խտացրած կաթի՝ 77 %-ը: Շաքարի ճականդի վերամշակման 2/3-ը վերահսկվում է կոոպերատիվների կողմից¹¹: Ֆինլանդիայում անասնամորթի՝ 86, կաթի արտադրության՝ 90 %-ը իրականացնում են կոոպերատիվները¹²:

Այսպիսով, ինչպես տեսանք, կոոպերացիան բավականին մեծ տեղ է դրավում կապիտալիստական երկրների գյուղատնտեսության մեջ: Կոոպե-րացիայի կշիռը աստիճանաբար աճում է նաև այն երկրներում, ուր այն համեմատաբար թույլ է զարգացած, օրինակ, ԱՄՆ-ում: Դա բնականոն պրո-ցես է, որը հատուկ է բոլոր երկրներին: Եվ քանի որ այս հարցում ևս ինժե-րացառություն է կազմում, կարծում ենք, հետաքրքիր կլինի անդրադառնալ մեր երկրում կոոպերացիայի պատմությանը:

Նախահեղափոխական Ռուսաստանում կոոպերացիան խոր արմատներ չունի: Ռուսաստանը թույլ զարգացած կապիտալիստական երկիր էր: Կա-պիտալիստական հարաբերությունների զարգացման մակարդակը շատ ցածր էր հատկապես գյուղում: Ճորտատիրությունը Ռուսաստանում թողել էր սո-ցիալ-տնտեսական, հոգեբանական և մշակութային խոր հետևանքներ: Գյու-ղացիությունը դեռևս սոցիալապես ճնշված դասակարգ էր, գյուղացիները չէին կարող ազատորեն տնօրինել իրենց հողակտորը, գյուղում զգացվում էր դրամական միջոցների պակաս: Իսկ կոոպերացիայի զարգացման համար անհրաժեշտ պայման է շուկայական ազատ հարաբերությունների առկայու-թյունը: Կոոպերացիան պահանջում է նաև որոշակի կոլտուրական մակար-դակ, որը ևս շատ ցածր էր: Դրա հետևանքով կոոպերացիան կազմակերպ-վեց վերևից՝ լիբերալ կալվածատերերի կողմից, Գերմանիայի օրինակով: Ռուսաստանում կոոպերացիան հենց սկզբից չկազմակերպվեց բաժնե-տիրական սկզբունքով: Կոոպերատիվների միջոցները գոյանում էին պետա-կան բանկի, ղեկավարների, մասնավոր անձանց և կազմակերպությունների

⁷ Նույն տեղում, էջ 59:

⁸ АПК, экономика, управление, М., 1988, № 7, с. 112.

⁹ Նույն տեղում:

¹⁰ Նույն տեղում:

¹¹ АПК, экономика, управление, М., 1989, № 9, с. 120.

¹² Նույն տեղում, 1988, № 7, էջ 112:

վարկերից: Մինչև 1917 թ. կոոպերացիայի ամենատարածված ձևերն էին սպառողականը (11,5 մլն անդամ) և վարկայինը (10,3 մլն)¹³:

Կոոպերատիվների կառավարումը իրականացվում էր կոոպերատիվների խորհուրդների կողմից, որոնք ընտրովի մարմիններ էին: Սակայն կոոպերացիայի զարգացման համար Ռուսաստանում կային լուրջ խոչընդոտներ, որոնց թվին էր պատկանում ուսական գյուղացիական համայնքը: Համայնքի քայքայման առաջին լուրջ փորձը կատարեց Ս. Վիտտեն, որը գտնում էր, որ կոոպերացիայի զարգացումը հնարավոր է միայն անձնական սեփականատիրության և զարգացած քաղաքացիության դեպքում¹⁴: Առաջին փորձն անհաջող էր: Յրկրորդը ձեռնարկեց Ստոլիպինը: Կառավարության գլուխ անցնելով, նա սկսեց իր բարեփոխումների ծրագրի իրագործումը: 1906 թ. գյուղացիներին վաճառվեց պետական հողերի մի մասը, վերացվեց խմբական երաշխավորությունը, գյուղացիներին ազատ տեղաշարժի իրավունք տրվեց¹⁵: 1917 թ. գյուղացիական հողի 62,5 %-ն արդեն մասնավոր սեփականատիրություն էր¹⁶: Սակայն բարեփոխումները անավարտ մնացին: Նախապատերազմյան շրջանում կառավարման խորհրդի անդամների 80 %-ը կազմում էր գյուղացիությունը¹⁷: Դա վկայում էր ուսական կոոպերացիայի աստիճանական դեմոկրատացման մասին:

Փետրվարյան հեղափոխությունից հետո, շնայած պատերազմական գործողություններին, կոոպերացիան վերելք ապրեց: Սակայն Հոկտեմբերյան հեղափոխությունից հետո կոոպերացիայի վերընթաց զարգացումը կանգ առավ:

Քանի որ կոոպերացիայի ճակատագիրը կապված էր լենինյան գաղափարների էվոլյուցիայի հետ, ուստի անդրադառնանք Վ. Ի. Լենինի մոտեցմանը այս հարցին: «Կապիտալիստական» կոոպերացիան ապահովում էր սոնտեսական առաջադիմությունը, հետևապես այն ամրապնդում էր կապիտալիզմի դիրքերը, և այդ պատճառով հարմար չէր սոցիալիստական հասարակարգ կառուցող երկրին: Սակայն Լենինը բարձր էր գնահատում կոոպերացիայի դերը ժողովրդական զանգվածների ինքնագործունեության զարգացման գործում: Բացի դրանից, կոոպերացիան վերափոխելուց հետո, այն կարելի էր օգտագործել ամբողջ հասարակության վերահսկողության համար: Պետք է նշել, որ այդ տեսությունը վերջնականորեն մշակված չէր: Բավական է ասել, որ Լենինը ոչ մի առանձին աշխատություն այս հարցին չի նվիրել: Սակայն ընդունվեցին առաջին դեկրետները՝ «Սպառողական կոմունաների մասին» (20. III. 1919) և «Բոլոր տեսակի կոոպերատիվ կազմակերպությունների միավորման մասին» (27. I. 1920): Այս դեկրետներով փաստորեն վերջ դրվեց գյուղատնտեսական կոոպերացիային:

Այն, որ «սոցիալիստական» կոոպերացիայի նպատակը հսկողության սահմանումն էր, հաստատում է հետևյալը.

1. վերջ դրվեց կամավորության սկզբունքին: Լենինը դրա փոխարեն նախատեսում էր «ամբողջ բնակչության ստիպողական միավորում արտադրասպառողական կոմունաների մեջ»¹⁸, դրանով հնարավորություն էր ստեղծվում հսկել աշխատանքն ու բաշխումը:

2. Վերացվեց բաժնետիրության սկզբունքը: Ըստ բաժնեվճարի, բաշխման փոխարեն նախատեսվում էր անցնել «պրոլետարա-կոմունիստական

¹³ Л. Е. Файн, История разработки В. И. Лениным кооперативного плана. М., 1970, с. 58.

¹⁴ Вопросы истории, 1990, № 8, с. 44.

¹⁵ Նույն տեղում, № 6, էջ 63:

¹⁶ Новый мир, 1988, № 5, с. 185.

¹⁷ История СССР, 1989, № 4, с. 65.

¹⁸ Վ. Ի. Լենին, ՆԺԺ, հ. 36, էջ 92:

սկզբունքին»¹⁹, որը առավելություն էր տալիս չքավոր և մասամբ միջակ գյուղացիներին:

3. Վերջ դրվեց կոոպերացիայի տեսակների բազմազանությանը՝ բոլոր սպառողական ընկերությունները միավորվեցին մեկ կոմունայի մեջ, որը միակն էր տվյալ տարածքում:

4. Վերացվեց կառավարման դեմոկրատական սկզբունքը, քանի որ կառավարման տեղական մարմիններն իրենց ներկայացուցիչներին էին մտցրելով կոոպերացիայի խորհրդի մեջ, և դրանց իրավունք էր վերապահվում ցանկացած ժամանակ կասեցնել խորհրդի որոշումը:

1918 թ. դեկտեմբերի 2-ի դեկրետով արդեն ազգայնացվել էին կոոպերատիվ բանկերը: Այդ դեկրետով պետությունը նաև հսկողություն հաստատեց վարկային կոոպերացիայի նկատմամբ:

Դեկրետները պետք է նախապատրաստեին անցումը «միասնական համաժողովրդական կոոպերատիվին»:

Ինչ վերաբերում է գյուղատնտեսական կոոպերացիային, այն միանշանակ անկում էր ապրում: Դրա պատճառներն էին.

1. երկրի տնտեսական քայքայվածությունը,
2. կոոպերատիվ կենտրոնների և միությունների փոխարինումը դեռ լրիվ չկազմավորված նոր մարմիններով,
3. հին ապարատի մասնագետների կորուստը,
4. նյութական բազայի մասնակի քայքայումը,
5. խախտվել էին հին տնտեսական կապերը, իսկ նորերը չէին կազմավորվել:

6. «Ուղղման կոմունիզմի» պայմաններում կոոպերատիվների տնտեսական գործունեության շատ բնագավառներ ավելորդ էին դարձել:

Շուտով պարզվեց, որ տնտեսությունը սնանկ է, որ հետամնաց Ռուսաստանը չի կարող «միասնական համաժողովրդական կոոպերատիվ» դառնալ, և երբ «Ուղղման կոմունիզմից» անցում կատարվեց ՆԷՊ-ին, ագրարային ոլորտում բազմակացութաձևության հաստատման հետ փոփոխվեց նաև մոտեցումը կոոպերացիային: 1921 թ. նոր դեկրետներ են ընդունվում՝ «Սպառողական կոոպերացիայի մասին» (7. IV.), «Արհեստագործական կոոպերացիայի մասին» (26. VII.), «Գյուղատնտեսական կոոպերացիայի մասին» (16. VIII.), «Վարկային կոոպերացիայի մասին» (24. I. 1922):

20-ական թվականներին կոոպերացիայի մեջ ընդգրկված էր գյուղացիական տնտեսությունների ավելի քան 35 %-ը: Կոոպերատիվների բազմաթիվ տեսակներ են առաջանում (կաթի, կարագի, պանրի և այլն): Սպառողկոոպերացիայի միջոցով իրացվում էր մսի 20 %, ցորենի՝ 40, բամբակի՝ 80, ճակնդեղի և վուշի՝ 90 %-ը²⁰: ՆԷՊ-ի շրջանում սպառողկոոպերացիայի զլխավոր խնդիրն էր օրգանաբերական արտադրանքը գյուղատնտեսական մթերքների հետ փոխանակելու պետության առաջադրանքի կատարումը:

Սպառողական առաջին ընկերությունը Հայաստանում հիմնվել էր 1898 թ. Երևանի թեմական դպրոցի մի խումբ ուսուցիչների, արհեստավորների, առևտրական տների գործակատարների, մանր վաճառականների ջանքերով: 1917 թ. վերջերին Արևելյան Հայաստանում գործում էր 270 սպառողական կոոպերատիվ: 1919 թ. ստեղծվում է Երևանի նահանգի սպառողական ընկերությունների միությունը, որը 1919 թ. հունիսի 28-ին վերանվանվեց Հայկոոպ²¹: Հայաստանում խորհրդային կարգեր հաստատվելուց հետո սպառողկոոպերացիան սկսում է իրականացնել նաև վարկային և արտադրագյուղատնտեսական կոոպերատիվների ֆունկցիաներ: Թեպետ գյուղա-

¹⁹ Վ. Ի. Լենին, ԵԼԺ, հ. 37, էջ 584:

²⁰ Как решать продовольственную проблему, М., 1989, с. 7.

²¹ Հայկական սովետական հանրագիտարան, հ. 6, Երևան, 1980, էջ 195:

տնտեսական կոոպերացիան Հայաստանում առաջացել էր մինչև հեղափոխությունը, սակայն գործունեության համար բնականոն պայմաններ չունենալու պատճառով թույլ էր զարգացած: 1924 թ. գյուղատնտեսական կոոպերատիվների առաջին համագումարում ձևավորվեց Հայգյուղկոոպը, ստեղծվեցին վարկային, այնուհետև մատակարարման և առևտրական կոոպերատիվները: 1924 թ. Հայաստանում գործում էր 5 գյուղվարկային ընկերություն, 6 կաթնարտել և 2 հողօգտագործման ընկերություն, որոնցում ընդգրկված էր 1384 մարդ²²:

Հանրապետությունում գյուղատնտեսական կոոպերացիան շատ դանդաղ էր զարգանում: Դրա պատճառը հայ գյուղացու ձգտումն էր դեպի մասնավոր սեփականությունը, իսկ խորհրդային կոոպերացիան ուղղված էր հենց այդ սեփականության դեմ: Աշխատող գյուղացին տեղ չունեի այդպիսի կոոպերացիայում: Խորհրդային կոոպերացիան ուներ դասակարգային բնույթ, և, ինչպես նշվում էր 1924 թ. սեպտեմբերի 20-ին Երևանում բացված գյուղկոոպի I համագումարի որոշման մեջ, «Գյուղի բարձր խավերը և վերջին տարիներին ուղծացած էլեմենտները տեղ չունեն կոոպերացիայում»²³:

Կոոպերացիայի այն ձևերը, որ չէին սպառնում հայ գյուղացու սեփականատիրական ձգտումներին, համեմատաբար ավելի արագ էին զարգանում: 1928 թ. հանրապետությունում արդեն գործում էին 95 կաթնարտել, 41-ը՝ գյուղվարկային, 25-ը՝ այգեգործական, 17-ը՝ մեքենաօգտագործման, 32-ը՝ հողօգտագործման և այլ ընկերություններ²⁴: Կոոպերացիայի «պարզ» ձևերը գերիշխում էին լեռնային գյուղերում:

Կոոպերացիայի զարգացմանը խոչընդոտում էր նաև հայկական գյուղի սոցիալ-տնտեսական ծայրահեղ հետամնացությունը: ՆեՊ-ը զարգացման համար ստեղծեց որոշ հնարավորություններ:

«Կոոպերացիայի մասին» Լենինի հոդվածը, ընդամենը նոր փոփոխված պատկերացումների շարադրանքը լինելով, ընդունվեց որպես ծրագիր և ստացավ «Լենինյան կոոպերացման պլան» անվանումը: Հոդվածում նշվում է, որ հասարակության զարգացման հետ կոոպերացիայի պարզագույն ձևերից պետք է անցում կատարվի դեպի ամենաբարձր արտադրական կոոպերացիան: Այսօր դարգացած կապիտալիստական երկրներում այդ ձևերը գործում են կողք-կողքի միմյանց չհանգարելով, և գերադասությունը տրվում է այն ձևին, որը այս կամ այն պայմաններում ամենահարմարն է: Հոդվածում նշված՝ անցման կամավորությունը փաստորեն պարզագույն բնույթ ուներ: Լենինի մահից հետո աստիճանաբար ՆեՊ-ից անցում է կատարվում ստալինյան տնտեսական քաղաքականությանը: Սկսվում է «Լենինյան կոոպերացման ծրագրի» համատարած կոլեկտիվացման իրագործումը: Նշենք դրա հետևանքները կոոպերացիայի համար.

1. Կոլտնտեսությունների բռնի հաստատմամբ մոռացվեց ՆեՊ-ի շրջանում վերականգնված կամավորության սկզբունքը (բռնություն էր կատարվում ոչ միայն մարդկանց կամքի և գույքի, այլև կյանքի նկատմամբ): Գյուղացուց խլեցին և՛ հողը, և՛ անասունները, և՛ աշխատանքի առարկաները:

2. Կոլտնտեսությունների արտադրանքը բխում էր ոչ թե որպես այդ կոլեկտիվի սեփականություն, այլ պետության սեփականություն: Պետությունը վերցնում էր Կոլտնտեսություններից այն ամենը, ինչ իրեն անհրաժեշտ էր: Արտադրության գինը ցածր էր ինքնարժեքից: Պատահական չէ, որ այս շրջանում ԽՍՀՄ-ի հաղաթուղտ վայրերում սարսափելի սով բռնկվեց: Անմիջական արտադրողից արտադրողին արդյունքը օտարելով, վերջ դրվեց

22 Գ. Մ. Գեղամյան, Սոցիալ-տնտեսական փոփոխությունները Հայաստանում ՆեՊ-ի տարիներին (1927—1930), Երևան, 1978, էջ 101:

23 Նույն տեղում, էջ 102:

24 Նույն տեղում, էջ 103:

կոոպերացիայի կարևորագույն սկզբունքներից մեկին՝ նյութական և բարոյական շահագրգռվածությանը:

3. Քանի որ կոլտնտեսությունները բացի արտադրական ֆունկցիայից պետք է իրականացնեն և այլ ֆունկցիաներ, կոոպերացիայի պարզագույն ձևերը համարվեցին ավելորդ և վերացվեցին: Սակայն կոլտնտեսությունները չէին կարող արտադրել և վերամշակել այն ամենը, ինչ մինչ այդ արտադրում էին գյուղատնտեսական կոոպերատիվները: Այդ տեսակետից կոլտնտեսությունների ստեղծումը հարվածեց նաև սպառողի շահերին: Մինչև այժմ չի լուծված գյուղատնտեսական մթերքների պահեստավորման և անկորուստ իրացման հիմնահարցը, որին հաջողությամբ կարող էր հասնել կոոպերացիան:

4. Կոլտնտեսությունը չէր կարող ինքնուրույն ձևավորել իր արտադրական կառուցվածքը, որոշել տնտեսության վարման պայմանները, արտադրության բաշխումը, եկամտի բաշխման կարգը: Կոլտնտեսությունները ամեն ինչով միանման էին երկրի տարրեր շրջաններում, որոնք ունեին տնտեսական, սոցիալական, ազգային էական տարբերություններ: Դրա հետևանքով որոշ շրջաններում կոլտնտեսությունները, էլ չենք ասում խորհրդատնտեսությունների մասին, ուղղակի քայքայում էին գյուղատնտեսությունը: Գյուղեր կային, որոնցում բնակչությունը դարձրել էր շարունակ զբաղվել է նաև արհեստներով: Սակայն արգելվեց անհատական աշխատանքային գործունեությունը, վերացվեցին արհեստագործական կոոպերատիվները, և այդ գյուղերը դատապարտվեցին քայքայման և հետագայում ամբողջովին լքվեցին:

5. Կոլտնտեսությունների ստեղծման մեթոդներն իրենց հետքը թողեցին ողջ կոլտնտեսային կարգի վրա: Կոլտնտեսություններն ընկան երկակի ենթակայության տակ՝ գերատեսչական և վարչատարածքային:

6. Կոլտնտեսությունները հենց սկզբից դիտվում էին որպես անլիարժեք, անցողիկ ձև: Ապագան պետք է պատկաներ խորհրդատնտեսություններին (սովորության ուժը այնքան ուժեղ է, որ այդ դրույթը արտացոլվել է նաև 1988 թ. մայիսի 26-ի «Կոոպերացիայի մասին» օրենքում, ուր առաջատար դերը հատկացվում է պետական (համաժողովրդական) սեփականությանը):

1950—60-ական թվականներին սկսվում է կոլտնտեսությունների խոշորացման պրոցեսը, որի արդյունքը հայտնի է՝ քայքայված գյուղեր ու տնտեսություններ: ՄՏԿ-ները, որոնք նախկին «մեքենաների կոոպերատիվների» պետականացված ձևն էին ներկայացնում և կոլտնտեսություններին ուղղակի կեղծեղով մարմիններ, լուծարվեցին, դրանց արտադրամիջոցները վաճառվեցին կոլտնտեսություններին: Դրանով ընդլայնվեց վերջիններիս սեփականության օբյեկտը, սակայն տնտեսական էական բարելավում տեղի չունեցավ, որովհետև այդ տնտեսական մեխանիզմը արդեն չէր գործում: Աճեց անշահութաբեր կոլտնտեսությունների թիվը: Կոլտնտեսությունները արդեն կատարել էին իրենց առաքելությունը, որը փոփոխված մեթոդներով միջնադարյան ճորտատիրական շահագործման վերականգնումն էր: Կոլտնտեսային համակարգի նպատակն էր.

1. Գյուղացու ամրացումը հողին (մինչև 60-ական թվականները գյուղացին չունեցրեց անձնագիր և առանց գյուղխորհրդի հատուկ թույլտվության այլ վայր տեղափոխվելու իրավունքից զրկված էր):

2. Պետական հսկողության սահմանում մանրապրանքային տնտեսության, նրանում ստեղծված հավելյալ, երբեմն նաև անհրաժեշտ արդյունքի նկատմամբ: Դրա հետևանքն էր գյուղացու օտարումը հողից և հակասության ստեղծումը կոլտնտեսային համակարգի ներսում, հակասություն, որը հասցրեց ոչ թե զարգացման, այլ կոլտնտեսային համակարգի քայքայման:

Տնտեսությունն ունի զարգացման իր օրինաչափությունները, և այն, ինչ խոչընդոտում է դրան, ուշ թե շուտ պետք է վերացվի: Սակայն արմատական փոփոխությունները տնտեսության մեջ անհնար էին առանց քաղաքական

խոր փոփոխությունների և, բացի այդ, լենինյան կոոպերատիվ պլանի համաձայն, սեփականության երկու ձևերը պետք է միաձուլվեն:

Կոլտնտեսությունների որոշ ֆունկցիաներ տրվեցին պետական ծառայություններին («Գյուղտնիսկան», «Գյուղտնտքիմիան», շինարարությունը, տրանսպորտը և այլն): Որոշ կոլտնտեսություններ վերածվում էին խորհրտնտեսությունների, որից հետո դադարում էին շահութաբեր լինելուց. բոլոր ծախսերը արդեն հոգում էր միայն պետությունը:

1960—1983 թթ. Հայաստանում կոլտնտեսությունների թիվը 760-ից իջավ 218-ի, իսկ խորհրտնտեսությունների թիվը 83-ից՝ 491-ի²⁵, 1960 թ. կոլտնտեսությունները օգտագործում էին ԽՍՀՄ-ի հողային տարածքի 3/4-ը, 1980 թ.՝ 1/4-ը²⁶: Այդ քաղաքականությունը արտադրության աճ չտվեց, քանի որ սովխոզը տնտեսապես ավելի արդյունավետ ձև չէր, բայց մեծացան պետության ծախսերը: Կոլեկտիվ և պետական սեփականության փորձ էր նաև Ագրոարդի ստեղծումը, որը շուտով վերաճեց վարչական մի մեծ ապարատի: Դա ևս մեծ հարված էր կոլտնտեսային համակարգին, քանի որ՝

1. Տնտեսապես թույլ կոլտնտեսությունները ագրոարդյունաբերական միավորման (ՇԱՍՄ-ի) միջոցով ամրացվեցին ավելի ուժեղներին: Դրանով շահութաբեր տնտեսությունները անշահութաբերների հետ դրվեցին հավասար պայմանների մեջ և բավականաչափ տուժեցին դրանից:

2. Կոլտնտեսությունները խորհրտնտեսությունների հետ սկսեցին օժանդակ տնտեսությունների դեր կատարել ՇԱՍՄ-ում: Պետական միջոցների ներդրումը, կոլտնտեսությունների պարտքերի մարումը և այլն ոչ մի բան չեղավում չէին կարող կատարել: Չնայած այս ամենին, պետք է նշել, որ կոլտնտեսությունները համեմատած խորհրտնտեսությունների հետ, տնտեսապես ավելի կայուն էին և շահութաբեր: 1987 թ. շահութաբերության մակարդակը կոլտնտեսություններում կազմում էր 24 %, խորհրտնտեսություններում՝ 17 %²⁷ (Հայաստանում համապատասխանաբար՝ 8,3 և 26 %)՝ Արտադրանքի ինքնարժեքը կոլտնտեսություններում ավելի ցածր է, աշխատանքի արտադրողականությունը՝ բարձր:

Ինչ վերաբերում է սպառկոոպերացիային, վերը նշված թերությունները այնպիսի վերափոխության ենթարկեցին այն, որ այժմ այն վերածվել է մի մոնոպոլիայի, որը կարող է իր պայմանները թելադրել արտադրողին: Պատահական չէ, որ դյուղացին այսօր գերադասում է իրացնել իր տնտեսության արտադրանքը շուկայում կամ օգտվել միջնորդ առևտրականի ծառայություններից:

Այսպիսով, կոլտնտեսային համակարգն ու կոոպերացիան սկզբունքորեն տարբեր կազմակերպություններ են: Կոլտնտեսային սեփականության ձևը մեր հանրապետությունում իր դարն ապրել է: Գյուղում արդեն սկսվել է սեփականաշնորհման գործընթացը: Կոոպերացիայի զարգացման համար բարենպաստ պայմաններ են ստեղծվել, որ այսօր կարող է մեծ օգնություն ցույց տալ դյուղացուն: Միայն նրա միջոցով է կարելի պահպանել նյութական այն բազան, որ այսօր կա գյուղում: Պատահական չէ, որ տարերայնորեն գյուղատնտեսական կոոպերատիվներ արդեն ստեղծվում են, և տարիներ են պետք բրանց գնահատականը տալու համար: Սակայն մի բան այսօր արդեն պարզ է՝ ալտուհետև մեր հողը անտեր չի մնա, անկախ այն բանից, թե ինչպիսի տնտեսավարման ձև կընտրի գյուղացին:

²⁵ Проблемы социально-экономического развития горных районов, Ереван, 1985, с. 30.

²⁶ Как решить продовольственную проблему, с. 7.

²⁷ Նույն տեղում, էջ 11:

²⁸ С. Е. Оганян, Агро промышленный комплекс Арм. ССР (экономико-географическое исследование эффективности и организации, Ереван, 1989, с. 12.

К ВОПРОСУ О КООПЕРАЦИИ И КОЛХОЗНОЙ СОБСТВЕННОСТИ

Л. С. ЗАКАРЯН

Р е з ю м е

Сейчас в нашей республике происходят глубокие экономические изменения, одним из которых является приватизация земли. Перед крестьянами стоит ряд нерешенных проблем, что затрудняет исполнение принятого Верховным Советом Республики Армения «Закона о крестьянских коллективных хозяйствах», который оставляет выбор форм собственности и ведения хозяйства за крестьянами.

Наиболее распространенной в развитых капиталистических странах формой ведения хозяйства является кооперация, в основе которой лежат фермерские хозяйства.

В СССР развитие кооперации имеет свои исторические особенности. Классическая кооперация переросла в советскую колхозную систему, в ходе чего были утеряны наиболее ценные черты кооперации. Колхозная система экономически не оправдала себя, и наряду с гос. собственностью явилась причиной упадка деревни.